

者中气未虚，表而出之，不欲其陷入他经。此曲突徙薪之计也。盖太阳经气，日行于表，挟饮入于胃之精气。疏达于玄府，以卫外而为固。方六淫之邪初犯皮毛，有先阻其汗液，脉浮头项强痛而恶寒者，名曰伤寒。有汗出恶风而脉缓者，名曰中风。发热而渴，不恶寒者，名曰温病。推之痉湿喝三证，仲景俱以太阳名之。盖太阳为寒水之经。外主汗液，内主小便，越人《难经》所谓伤寒有五者，正此意也。是故《内经》云：湿上盛而热，治以苦温，佐以辛甘，以汗为故而止。此即湿温属太阳之证也。又云：因于暑，动则喘喝，静则多言，体若燔炭，汗出而散，此暑病属太阳之证也。又曰：风寒客于人，使人毫毛毕直，皮肤闭而为热，当此之时可汗而发，此风病属太阳之证也。病气既属太阳，即不得不谓之伤寒。今按鞠通书，于他经之病，未尝显背仲景，特于太阳一经，缺而不备，不知太阳实他经门户。譬诸盗贼之来，岂有门户不辟而人人堂奥者乎。特温热暑湿之受病，与风寒同。温热暑湿之发病，与风寒略异，鞠通见其末而不揣其本，尝即其误会之处，为鞠通原之。

夫寒则血凝涩，暑则气淖泽，虚邪因而入客。《经》言略可徵之矣。冬三月，皮毛紧，肌腠密，故风寒之中人，使人毫毛毕直，虽曰日传一经，正有二三日未离太阳者，若夫发陈藩秀之令，阳气发自地中，使人皮毛肌腠，日渐疏泄，故有初犯太阳而已兼阳明者。此之不可不辨也。鞠通之言曰：凡病温者，始于上焦，在手太阳。又曰：温病由口鼻而入，不知六淫之犯太阳，外袭皮毛，即内应于肺，盖太阳主一身之表，肺主皮毛，病机之传袭，正如桴鼓相应，无论温病为然，即风寒之病，何独不然。请略举之以证鞠通之失。

肺主气,气郁则喘,肺开窍于鼻,肺热则自衄。天气通于肺,风寒袭之,痰涎窒肺窍,不能顺受天气,则拂逆而为咳。《伤寒论》曰:太阳病,头痛发热,身疼腰痛,骨节疼痛,恶风无汗而喘者,麻黄汤主之。伤寒脉浮紧,不发汗,因致血衄者,麻黄汤主之。伤寒表不解,心下有水气,干呕发热而咳或喘者,小青龙汤主之。之三证并见手太阴证。仲景列之于太阳篇者,以其受病之原,则固起于太